

清 史 列 傳

冊 目



清史列傳 卷七十五

循吏傳二

閻堯熙

閻堯熙字涑陽河南夏邑人祖籍山西太原康熙四十五年進士點者益無忌
隸藁城縣知縣邑濱滹沱河常以秋浸溢爲築隄建木樁數千以捍其衝夾岸植
柳以固之水不爲患雍正元年調南宮縣未幾擢晉州知州州瀕河河失故道蕩
析民居請設法安集民免河患者來謝扶攜老稚相屬於道堯熙曰聖恩我何與
令望闕拜復念遠來給百錢以資裹糧散錢十萬民益感激泣下曰眞父母也怡
賢親王奉使過晉聞其名奏循良第一授山東青州府知府未之官改授浙江嘉
興府俗健訟良懦不得直府訟批縣或不理狡黠者益無忌堯熙始至日判狀三
百比對簿自請息者二百餘庭折數十得豪民張某狡黠狀杖殺之民譴然稱快
府賦重吏胥因緣爲奸民完如額官不知民亦不自知前官累以缺賦課殿去堯
熙巡行清理民始知額歲無逋賦海鹽縣塘工不就總督李衛欲開引河堯熙言

滻水入內河田畝皆傷非特壞廬舍糜帑金也議遂罷營弁緝私鹽縱其梟持他人抵罪堯熙言其誣總督不聽庭爭再三總督乃自勘釋獄愈賢堯熙累遷湖北按察使前政深刻堯熙至務生全不苛擢四川布政使成都當康熙時兵燹未久人稀穀賤故滿兵願得銀雍正以後生聚多穀貴又願得穀或徇其意請於朝令民受銀購穀給兵而漢兵亦欲仿行堯熙不可督兵爭之堯熙曰滿兵例不出城文字言語與漢殊故代之購漢兵募自民間父子兄弟皆民也奚不自購而煩代購乎督兵語塞事遂止堯熙質直好面折人過雖上官不少假然宅心光大勇於從善初至成都聞錢價貴榜平其直以成都知府王時翔言立毀榜又總督議徙涼州駐防兵於成都拓滿洲城堯熙與時翔按圖籍力爭止之語皆在時翔傳中乾隆七年卒劉紹攽九畹集

魏嶼

魏嶼畿輔詩傳直隸南樂人太學題名碑康熙四十五年進士五十四年授浙江錢塘縣知縣縣附藩事至劇吏易爲姦嶼下車先潔已罷民間供應曩時相沿如倉胥供署中食米屠僧供肉江步供薪歛戶供魚之類一日盡革之晨夜治簿書斷理

獄訟無留牘無遁情減正賦耗羨諭民以時輸租民爭相勸輸勿累縣官課遂稱最故時徵漕主倉吏饋官千金嶼嘆曰無故捐多金非人情其姦不待問也自止於倉親評米高下令納者自操量畢徵吏無私焉杭駐防旗丁多不戢市物薄予之直挑婦女於道民病之前官以非所隸不致詰嶼至輒移所司論罪遂相戒勿敢犯海塘歲修不貲時議有欲令民出家財佐公者令紳士爲倡嶼請曰浙士皆無貲且此例一開貽患無窮事遂寢縣志閱八十年不修嶼開館搜輯成書三十六卷五十七年自効去官時勢豪與民爭墓田上官右豪嶼不自得力求去無以爲辭迺以庫貯前官所補金微惡及民輸錢之當易銀者未盡納二事坐虧空免百姓籲留者數千人或持金代償上官意亦悔奏復原官嶼堅不起雍正九年卒抱經堂集有鋤經山房稿一卷且齋草四卷畿輔詩傳

趙之鶴

趙之鶴奉天正白旗人康熙四十六年由四川納谿縣知縣擢濟寧州知州州有稅課局額不及千兩吏以術數倍征之之鶴悉爲裁革物少不及稅則者免其徵四十八年秋大雨水城中掣舟往來西城外南北瀦爲大澤之鶴爲開水道發土

得故溝命工增甃之故溝見於元李謙爲冀德方去思頌謂迹訪故渠而爲之者其始作更在元以前舊矣於是爲橫溝一縱溝南北各一凡三溝達諸西門之外更立約每歲先夏啟治之今州無壅水之患之鶴力也阮氏衣冠族有世英者獨爲竊其母求斃之絕後禍察其色甚恐爲委曲開誨世英頓首堂下痛哭負其母歸卒爲良民回民文朗號虎頭魚溝暴鄉里則令荷校死州人快之州時屬兗州府兗之山繭衣被天下民資以爲業者衆有權貴人出巨資爲壘斷之鶴百方爲求免事獲已民爲壞像築生祠於南門外之鶴毀像而以其屋爲濟陽會館又潛立木主或刻像於石祀之在州十九年雍正二年州陞爲直隸州上官謂之鶴不勝任降補堂邑知縣去之日百姓挈壺榼跪拜號泣送者以萬數之鶴爲墮淚自朝至暮始達康莊驛至汶上爲鬱結不能食遂有疾至阿城卒之鶴之自汶上發也汶上人送者復數千怪問之皆曰吾邑知縣虐使吾民聞濟寧州善政愧而效爲之今亦爲好官故吾邑人無不戴德也祇平居士集濟寧州志

陳惠榮

陳惠榮直隸安州人爲諸生時與博野尹會一切勣正學有經世之志康熙五十

一年成進士六十一年授湖北枝江縣知縣修百里洲隄以息水患請除解餉入川雜派民無擾累雍正三年遷貴州黔西州知州丁父憂歸服闋署威寧府知府未幾威寧改州陞大定爲府以惠榮移補焉烏蒙土司叛東川鎮雄附之上官檄惠榮赴威寧防守城西陣傾圮聚民間米桶實土石累丈餘上加雉堞不終日而功成賊離城三十里縱火牛光燄燭天惠榮督土卒晝夜備禦賊不敢逼總兵哈元生援兵至賊乃遁尋丁母憂服除署江西廣饒九南道督潯陽大孤兩關宿弊盡革乾隆元年擢貴州按察使疏言古州吏目葉封印江縣典史章秉惠均以疏脫重犯越獄題革覆准獨貴定縣典史倪永吉部覆照有獄官例止予虛革前後互異無以示勸懲且府司則有司獄州縣則有典史吏目若司獄爲專管獄官典史吏目爲兼管獄官是覈轉衙門有專管之員承審衙門反無專管之員於設官制律之本意均有未協請處分酌歸平允監獄照例責成上是之飭部議行時苗疆新定方駐師歸興屯經略張廣泗以威重鎮服用法嚴峻二年貴陽大火惠榮入見廣泗曰天意如此當設誠修省苗亦人也可盡殺乎廣泗大感動申戒諸將吏如惠榮言四年署布政使以黔地瘠薄宜勸民務本計疏言黔省山多水足可

以疏土成田惟小民艱覓工本不能變瘠爲腴至於山土荒棄尤多流民思墾輒見撓阻桑條肥沃亦不知蠶繅之法自非牧民者有以經營而勸率之利不可得而興也今就鄰省雇募種棉織布飼蠶紡績之人擇地試種設局教習轉相倣效可以有成應將上游責成貴西道下游責成貴東道屯軍責成古州道俾之因地制宜隨時設教則一年必有規模三年漸著成效矣疏入得旨允行六年又奏陳課民樹杉得六萬餘株諭曰覽之欣悅蠶桑樹藝爲政之本所當時時留心教民務本足用之道均不外此七年貴筑貴陽開州威寧餘慶施秉各縣具報墾田至三萬六千畝種桑飼蠶秩然就緒復開野蠶山場百餘所比戶機杼聲相聞惠榮據以入告諭曰此等事論之似迂行之甚難若果妥協辦理則實有益於農民其勉爲之前後疏九上皆蒙嘉獎復繕城垣恤流民給孤老益囚食修拓齋舍進諸生勖以爲已之學自立志始士風爲之丕變十一年陞安徽布政使適鳳潁水災田廬漂沒急請發倉賑恤流移得以安集十二年卒於官

謝濟世

謝濟世廣西全州人康熙五十一年進士選庶吉士散館授檢討雍正四年轉浙

江道監察御史時上御門許科道直前奏事濟世露章言三事世宗震顏問云何對曰一錢法一鹽法上曰錢法大難朕方籌畫已又奏劾河南巡撫田文鏡貪瀆不法狀上顧諭曰彼號能臣朕方倚任爾無惑浮言還其奏衍石齋記事彙濟世伏不起爭益力上怒付法司鞫問梅莊雜著尙書勵杜訥命刑訊問指使何人濟世曰孔孟問何故則曰讀孔孟書自當忠諫見奸弗擊非忠也奏上議大辟得旨免死令往阿爾泰軍前效力先正事略濟世在軍臺平郡王及公大臣博爾屯伯大臣欽拜皆遇以殊禮欽拜則北面稱弟子夸藍大以下受業者不可更僕數平郡王命嗣王從受業會得二獵犬擬進奉濟世曰進犬非王事孰若進一二賢臣王顧嗣王曰侍御良言眞古人箴規之義不可忽也謝庭瑜撰小傳居三年上念效力諸臣以問振武將軍將軍劾濟世注大學誹謗程朱奏進其書廷議又謂有諷刺語卽成所下獄論死上復宥之尋準噶爾擾邊徙濟世察翰突糧餉營已又徙無量臺營已又徙鄂爾坤營衍石齋紀事彙高宗登極召還復補江南監察御史同上以母老乞外補小傳得旨授湖南督糧道衍石齋紀事彙善化知縣樊德貽衡陽知縣李澎巡撫許容心腹也其徵糧浮收皆倍蓰濟世易服爲鄉民廉得實乃捕澎丁役

揭參德貽皆格不行詣許容面陳狀詞過激容恚甚反列款糾濟世於是湖南士民揭帖訟冤有旨交總督孫家淦會輸濟世解任以岳常澧道倉德代時布政使張璨按察使王玠鍛鍊成獄謂所訪衡陽事皆虛而長沙知府張琳原詳稍徵寔與効疏歧適玠擢四川布政使過岳州手致璨書於倉德請密易原詳倉德不可慮摶衆忌遂以書呈總督總漕總督寢其事總漕移牒都察院左都御史劉統勳上之御史胡定采民謠以聞上命侍郎阿里袞馳讞至則士民數千人戴香迎馬首跪稱冤盡得朋謀傾陷誣罔周內狀力爲平反坐許容及藩臬守令皆革職總督亦免官濟世得雪李元度撰事略改授鹽驛道以老病休致家居十有二年卒濟世在塞外九年得究心聖籍尤精易理所著易在曾進御覽又著有医匝十經及以學居業集史評纂言內外篇離騷解西北域記小傳

葉新

葉新浙江金華人康熙五十一年順天舉人從蠡縣李塨受業立日譜稽核功過尤嚴義利之辨雍正五年就吏部揀選往四川試知縣既署理華陽縣事尋補仁壽民或與隣縣爭地界當會勘鄉保因閹人以賄請新怒悉下之獄勘畢歸各按

其罪由是吏民悉歛手奉法八年署嘉定州知州州故有沒水田多逋稅新視曠
土可耕者召民墾闢以新科抵稅額逋稅悉免仁壽奉旨采木匠人倚官爲暴民
弗堪糾衆相抗縣令以變告新馳至訊匠頭及首糾衆者一人竝治之釋餘數百
人不問上官以爲才有疑獄輒令往讞多所平反十二年遷印州知州乾隆元年
再遷夔州府同知署龍安及成都府知府又署瀘州知州瀘俗好訟初至案牘委
積新日坐堂上訟者至立剖決誣罔者杖遣之旬餘獄事大減及百日遂無留獄
七年署順慶府知府遷雅州丁母憂歸服除授江西建昌府知府以簡靜爲治先
教諭而後刑罰修盱江書院招引文學之士復南城黃孝子祠以厲民俗十三年
南豐縣知縣報縣民饒令德謀反請窮治令德好拳勇知縣以風聞遣役往偵誤
探其讎謂謀反有據遂逮令德適它往乃逮其弟繫縣獄令德歸自詣縣訊以重
刑遂誣服雜引親故及鄰境知識爲同謀知縣遽移檄追捕蔓贛撫二府新得報
集諸囚親鞫時株連者已七十餘人言人人殊新大疑詰縣役捕令德弟狀役言
初至令德家獲一篋疑有金寶匿之及發視無所有則棄之野知縣聞意篋有反
迹訊以刑遂妄稱發篋得簿筭納賄毀之矣令謂實然遂逼令德俾服也新於是

盡釋七十餘人鑠具命隨往南昌戒之曰有一逋者吾代汝死矣及至七十餘人則皆在謁巡撫具道所以巡撫愕不信集才能吏令會勘益雜逮治諸所牽引卒無據然不可卒解先是巡撫得報時遽上奏命兩江總督委官卽讞新爲一一剖解得白所全活三百許人十七年調贛州府有贛縣民搶奪拒捕案新依故例擬發邊充軍時新例已改本條爲斬決院司欲以改例擬新謂事在例前爭之不得復以寧都民獄事與同官持異同不得直遂謝事閉門候代上官慰諭再三不從遂以任性被議免歸家居十餘年卒魯仕驥所撰狀

施昭庭

施昭庭江蘇吳縣人康熙五十四年進士授江西萬載縣知縣縣險僻多山有客民自閩粵來居之累數十年積三萬餘人號曰棚民溫尙貴者臺灣逸盜也其黨亦散處山中爲拳勇師與棚民往來雍正元年福建移捕盜黨急尙貴度不免謀爲變始昭庭之至也以棚民爲慮縣人易廉野富而才昭庭厚禮之使交於棚民而值其所爲廉野大積粟貸棚民還不取息或免償如是者數年棚民大悅棚民之才者嚴林生羅老滿數從廉野游盡得山中要領尙貴將舉事召棚民廉野以

聞於縣昭庭集勇敢三百人卽以林生老滿統之爲要約以待棚民多受廉野恩不忍往從尙貴然往者猶數百人尙貴有衆二千大掠山林間時三月十三日也昭庭謂林生老滿曰賊易破也然吾慮賊或擾旁近縣旁近縣無備若使向萬載破之必矣會得賊譯四人厚撫之使告尙貴曰萬載人盡逃城虛可唾手得也賊遂決意向萬載乃張疑兵伏諸山徑中時鳴鼓譁囂樹大旗見旂或連擊數十馬相踶嘶或爇草若炊煙賊疑不敢入遂由官道來而棚民多受林生老滿計使趨捷者數十人分曹持兵伏叢棘中賊過突躍出大呼擊賊賊驚走輒追殺之伏數發賊疑駭欲卻又懼棚民之踵其後也於是濡被爲盾以進昭庭望見笑曰彼已懾矣使火槍二十餘迭擊之一戰獲尙貴尙貴起二日而敗又二日而撫營兵至初棚民嘗入市欺市人人積畏之尙貴叛道路洶洶指棚民昭庭謂林生老滿曰撫營至必搜山吾負棚民奈何吾以免死帖與諸降者汝及今趣棚民具不從賊結狀來其免乎兵至果搜山如昭庭計不戮一人巡撫初到官張其事入奏旣見君申文不合使請於總督查弼納欲改之昭庭曰吾不忍迫棚民使畔而殺之以爲功也不可改巡撫乃檄君謂棚民匿盜已久又從亂罪皆死今雖赦之必驅歸

本籍昭庭乃使人徧諭棚民無恐而請於督撫曰棚民者閩粵之貧人耳來居山中種麻自給以席爲屋故曰棚民非刀手老瓜賊之比也歷年多生齒衆與居民間有爭訐皆細故不足深懲今日之亂由臺灣逸盜不關棚民而探賊動止離賊黨羽誘賊就縛悉資棚民力請覈戶口編保甲列齊民泯其主客之形寬其衣食之路長治久安於計便查弼納許之巡撫尋亦悟如昭庭策棚民乃安事聞世宗臨朝諭九卿曰知縣以數年心力辦賊巡撫到官幾日豈得有其功耶獨下總督疏交部議敍以主事知州用昭庭尋引疾歸後十餘年卒於家錢儀吉撰事狀

劉士銘

劉士銘直隸宛平人康熙五十六年舉人六十一年授山西聞喜縣知縣聞喜故劇邑會政弛吏偷逋賦累歲而催科急民益大困士銘至則召縣之父老謂曰令拙於催科而民賦不輸是欲見令拙也願與父老約行滾單法何如滾單法者縣出單書賦戶名先甲次乙甲受單輸賦畢而單至乙乙受輸之如甲以次及於一縣賦戶畢然後上單於令者也父老則頓首曰如約於是士銘爲畫催租役於單首行之如法國賦歲入民無謗者又縣故有市集所在迴遠盜賊竊發爲買遷患

士銘令改市適中之所民大便利盜賊亦罷去民爲立祠祀之歷攝臨汾蒲州解
州雍正六年擢太原府同知兼攝和平定州尋授朔平府知府朔平地連北邊蒙
古部人與民相雜處而郡又新設民屬府而蒙古人隸都統戲下訟輒牽掣號難
治士銘謁都統與之談讌極歡曰某奉命來從公偕治天子人誓不得畫彼此界
自是蒙古人或暴恣士銘立杖決之久之帖然而民賴以安八年七月以母憂當
罷有旨在任守制士銘力請反葬而後赴職許之乾隆三年父歿去官兩喪六年
服闋補湖北安陸府知府楚俗悍詐獄成則抵罪而情或不實士銘苦心讞鞠多
所平反漢江在府城西上去襄陽七百里下去沔陽七百里水自北來徑石城西
南與大江合自石城下抵蔡家橋灣由馬公洲小河口以達於南河迴折三百餘
里土人謂之紅廟隄最要害在昔石城遠近湖港支分用洩水勢其後日以堙塞
而捍水者獨恃隄隄不固則風旦霖夕一蟻所盜千里爲壑士銘躬親相視滲漉
與役夫同甘苦其課工視引錐穿土毫髮不損乃已郡人喜曰我公不寐我民安
睡矣會孫家淦總督兩湖疏請調士銘知荊州士銘曰某得荊州人以美官賀豈
此間有所利耶問府四關有東中西北徵稅處卽令曰商賈自入庭中投所稅錢

於續役是土者不得與又問駐防兵丁糧餉故事自府支給所在州縣歲當輸南米二十餘萬石上府卽令諸邑曰至期悉以米來不得他有所代令兵丁曰月至府支餉二日支糧三日至期一如所支各罷去諸邑或請曰公若少通自便亦以便人士銘曰人之不便某任其咎通則何敢乎人以是服其清間攝理事同知事或有姦其姊之女而殺其夫者事已私解士銘訪按確實立置之法有兵丁在校場用火槍誤殺五人律不抵罪士銘驗得鉛子於屍中訊得故殺狀抵之士銘於所事雖非其專任未嘗苟也十四年春奉特命赴四川辦理臺站及金川平而還十五年八月授本省驛傳鹽法道各省鹽價皆畫一獨湖廣無定式士銘始令商毋二價且時取市中權秤親爲較其斤兩輕重毋多取民利十六年三月以所轄驛站遲誤公事劾去初士銘之被劾也同官有軋大吏以去者繼至者疑士銘主使之輒摭細故以劾士銘且欲窮治其他事以聞卒無所得旣而以士銘在荊州十年於是更使蹤跡之亦無狀所使者走謁士銘曰公誠賢者然上官使某蹤跡公無所得某無以報請公自書一二事告我士銘曰某不肖不敢不自愛惟憶爲巍使令節受商人花燈數物此破吾檢耳卽書款付之所使以反命上官默然及

按驛站所遲誤者在江南與士銘無與人曰何不白之士銘曰某服官三十年今以此釋負戴可矣遂歸三十年卒

莊亨陽

莊亨陽福建南靖人康熙五十七年進士知山東濰縣母就養卒於塗歸而廬墓三年自是未嘗一日離其父既沒講學漳江乾隆初元禮部尙書楊名時薦士七人亨陽與焉授國子監助教當是時上方嚮用儒術尙書楊名時孫家淦大學士趙國麟咸以耆壽名德領太學事相與倡明正學陶植邦彥六堂之長則亨陽與安溪官獻瑤無錫蔡德晉等皆一時之儕每朔望謁夫子釋菜禮畢登講座六堂中國子生以次執經質疑旬日則六堂師分占一經各於其齋會講南北學絃誦之聲夜分不絕都下號爲四賢五君子遷吏部主事外補德安府同知擢知徐州府徐仍歲水災亨陽相川澤諮耆民具方略請廣開上游水道以洩盛漲且告石林可危未及施工而石林決沛縣城將潰民逃竄亨陽駕輕舠行告父老曰太守來爾民何往親率衆堵築七日夜城完在徐三年兩遇大荒勤賑事至廢眠食九年遷按察司副使分巡淮徐海道亨陽通算及董河防推究高深測量之宜上

書當路大略謂淮徐水患在壅毛城鋪而徐州壞壅天然減水壩而鳳穎泗壞壅車邏昭關等壩而淮揚之上下河皆壞宜開毛城鋪以注洪澤湖則徐州之患息開天然壩以注高寶諸湖則上江之患息開三壩以注興鹽之澤則高寶之患息開范公隄以注之海則興鹽泰諸州之患息當路者未能用頗諱其言故事京察大臣當自陳高宗命自陳者各舉一人自代內閣學士李清植舉亨陽時論以爲允勘淮海災過勞以羸疾卒卒之日淮海諸氓罷市奔走樹幟哭而投暉亨陽少時執業於李光地光地甚重之鄂爾泰陳元龍嘗問士於方苞苞首言亨陽鄂爾泰使亨陽同官達意欲令其來見至再三亨陽曰吾往見是慕勢也相國何用見此等人將命者以告鄂爾泰瞿然曰吾非敢安坐而相招也顧吾非公事未嘗一出內城恐時人以爲疑吾平生惡勢交若以老諸生視我則不妨顧我矣亨陽始入見志相得後終不再至訥親巡江南監司皆韁袴跪迎亨陽獨長揖訥責問曰非敢惜此膝於公其如會典所無何訥默然亨陽出巡屬吏餽餒悉弗拒曰物已烹飪卻之是暴天物而違人情也所從僕皆自飲其馬或犒之踰而辭曰公視奴輩如兒子不告而受於心不安告之必命辭是仍虛君惠也強之皆伏地誓指其